

Takurda-o Burus o wu gene yan-dor Yeso n-me bo-o o-Korosiya

Rem-se ro n-me à:

M-zante 1:1-8

Nom-mo Shir un senge-m Kiristi ne 1:9—2:19

Hoog-m pu-mo n-me un Kiristi 2:20—4:6

Ur-kom 4:7-18

¹ Me Burus, me genbe ka takurda-o. Me **wan-Tom Yeso Kiristi** wu,* remen Shir daagu me un waragté ko-**yan-Tom Yeso**. Me kane un or na ne **Timoti** ko-yan-dor.

² Me no m-tombe un ka takurda-o, no hun-ne ye Shir un **Kiristi** ne. Komo or te ne yan-dor un bo-o o-Korosiya. Shir mustu no ba m-kukop, komo no ro yan-ess ut-ma ye be-de un wu. Um konog unze Shir o-Tato na wu sengu no m-gu, wu 'ye no m-yar un gwugwu-mo ur-hur ne.

Ur-bongon us-kon ne

³ Ko o ke da-o te us-kon rem no, te un bom un Shir rem no. Te us-kon be-de Shir wu ro Tato-o Wan-Koyan na Yeso **Kiristi** à.

⁴ Te bomog Shir rem no remen te hogute ma-to un sher-m no be-ur Yeso **Kiristi**, komo no m-was un kap hun-ne ye Shir ne.

⁵ M-sher m-was ne mo ro m-rwunte dish-o un rii-yo o-kwum yo Shir he no m-bopse yo wu essu

* **Bor-o gaan:1 1:1** Wu Shir daagne à.

no_ree n-Ton shir à. No_hogusute cin n-ga ne rem-se ur-bon se Shir swore o-nu wua nomo no_à. No_hogusute ka rem-se da-o hun-ne habe ye_ruru no_ **Ma-to_m-Rerem** ma-to o-nip mosse un **Kiristi** ne_à.

⁶ Ko_kene hun-ne ut-moor ne_ro m-hoge un ka **Ma-to_m-Rerem** to, komo hun-ne ut-moor ne_ro m-warag un yan-dor. Komo ye_ro m-nom un rii-yo Shir hette o-zak à. Yo ka yo un kor hond hond bo_nome be un no da-o no_hoge ka ma-to ur-takan à. Komo no_nak o-nip un yar-mo Shir ne, unze Shir ro_m-soks un **ba'as-to** un ye shere be-ur **Kiristi** à.

⁷ Epararas wu yoosu no_ka ma-to. Wu ro_m-nome un **Kiristi** m-guw, komo te wu m-con. Wu nomote Wan-Koyan m-guw un ess ut-ma. Un suge un te, wu nomte kaane,†

⁸ Wu wu komo_ruru te bo **Kukt-o Shir** ya'u no_m-was un kap hun-ne ye Shir ne_à.

⁹ Remen kaane cin ho-de te hoge ma-ut no to ur-bon à, te yage us-kon rem no_à. Ko_o ke da-o te us-kon unze Shir kutu no_myet rii-yo wu cone no_nom à. Te un kon-se Shir wu 'ye no us-weer us-nap ne_se un **Kukt-o Shir**.

¹⁰ Te un kon-se Shir unze no she'et, bo depe ka ye_dore Wan-Koyan ye she'et à. Komo no_senge wu un gwu'urse ur-hur un nom un rii-yo ur-bon ne. Te us-kon komo bo no he m-ma'as un nom un bo un rii-yo ur-bon koyanda à, no nep Shir ur-bon ne.

¹¹ Te komo us-kon be-de Shir wu tor kukt-o no wu 'ye no m-'wons, be-de un do ye un no beeb-de

† **Bor-o gaan:7 1:7** Hyen komo: Koro 4:12; Pmon 23.

un wu de rotte ur-me'et á. Te us-kon Shir kaane remen no hoksté m-joose o-zak m-gaag ut-men ne be-de un swo ur-koob.

¹² Te komo us-kon be-de Shir no senge bongon-de Shir Tato-o na. Wu wu muutu no hun-ne ye un wu, remen no bo'osté kum un ka cim-yo wua 'ye hun-ne ye un wu, ye ro ur-she'et m-ccas à.

¹³ Shir ruutu na un kom-to un **ko-Gwomo-wu un ya-ut-kot**, be-de un she'et-de o-comb. M-moka wu rwo'og Wà un wu Yeso wu wu ro m-was deen à, wu nom gwomo-ut na.

¹⁴ Remen Wà un wu, wu hokste nom un yo wu nome à. Kaane Shir rumsu na un kom-to un **ko-Gwomo-wu un ya-ut-kot**, wu sokste **ba'as**-ut na.‡

Kiristi jiishe

¹⁵ Yatt-wu ro m-hyan un Shir á, amba da-o Wà un wu barme net à, wu kutute hun-ne Shir. Wu ro un gwomo-to un koyan yo Shir nome à.

¹⁶ Un bu-yo ka Wà-wu, Shir nome koyan yo ro n-Ton komo o-dak ne à, myet yo a m-hyan ne komo un yo a m-hyane ne á. Mosse un wu ne a nome hun-ne ye ro ut-gwomo à. Yagunte **yan-tom-ye Shir** un to ken kukt-to ne. Komo koyan un cow-yo un wu a nomte yo, remen koyan yo ye'et wu m-sek.

¹⁷ **Wà-wu Shir** ro kon cin ba a un nom ko yo ke rii-yo, komo un wu ne ko yo ke rii-yo neke kang-o gaan.

¹⁸ Komo wu, **Kiristi**, wu ro un gwomo-to un hun-ne ye un wu. Komo wu ro ye m'er. Bo hi-ur ro un gwomo-to o-wur à, wu wu ro takan-de

‡ **Bor-o gaan:14 1:14** Hyen komo: Apis 1:7.

un hoog pu-o remen hun-ne ye un wu. Wu wu Shir takne m-'yons da-o wu mare à, komo wua do m-mar á. Remen wu ro ur-takan un koyan.Š

¹⁹ Remen Shir ye zongse unze ko de **Kiristi** waragte net à, wu ro hond hond un Shir ne un ko yo ke bu-yo.

²⁰ Komo **Kiristi** wu Shir nomte cow-yo m-muunte un koyan yo wu nome à, be-de m-hongse un wu ne. Yo ka mossute myet-mo un rii-yo ro n-Ton à un hono o-dak ne. Shir nomog o-cow remen ko yo ke rii-yo ma'aste ba ut-ween un wu ne. Shir nomog yo ka un bu-yo un ya'as un Wà un wu, a wuuste hyó-mo un wu, wu meret n-ton o-kan.*

²¹ N-ga no ya-o-Korosiya, no ro nomog m-pupa un Shir ne. Barag-us no rwo'og no waragte yan-yage-to Shir, komo no ro m-nom un rii yo-yo.

²² Amba m-moka, Shir hong sute she'et-ur so-de be-ur no un wu ne. Wà un wu waragte net komo wu mer n-ton o-kan. Shir hong sute no bo wu yage **Kiristi** meret rem no à. Wu un nom kaane remen da-o no he m-es un co-o Shir à wua goks no hun-ne ye ba m-kukop ba **ur-ba'as**. Komo yatt-wu he m-zee no nomog rii yo-yo á.

²³ Nip-o urege no ma'aste m-sheer be-de un **Ma-to m-Rerem**. Se no shereg ur-beeb ne untun hur-o a ma'e n-ton un shi'it-de m-'wons à. Taase no yage ko wu ke net-wu wen no hwo o-dish un rii-yo Shir swore o-nu un **Ma-to m-Rerem** to un wu à. No be'esute no hogussute ka ma-to. A russute hun-ne ka **Ma-to m-Rerem** to hono o-dak kap.

Š **Bor-o gaan:18 1:18** Hyen komo: Apis 1:22-23.
gaan:20 1:20 Hyen komo: Apis 2:16.

* **Bor-o**

Komo me Burus un hi un de wan-gaan wu be-de un guw-ne ye Shir ya m-ko'ot un ka ma-to.

Guw-m Burus be-de un yan-dor o Shir

²⁴ M-moka, me o-zak remen koob-de me m-swo rem no à. Un con-m re, men swoon ka koob-de. **Kiristi** conog um su ur-koob remen un wu remen um guut hun-ne ye un wu, **yan-dor Yeso**.

²⁵ Me wan-gaan wu be-de un nome un Shir m-senge remen gwu-o yan-dor kap. Remen Shir un daag me, wu ya'astu me ka senge-mo remen um guut no. Shir tomog me um yoosu no ma-to un wu ut-shishe.

²⁶ Shir wukute ka zonge-to n-ga, wu un nom kaane us-hak deen. Shir 'ya hun-ne us-nap á, amba m-moka upsusse yo ro be-de un hun-ne ye Shir.

²⁷ Shir daagte m-kute hun-ne un wu zonge-to un wu. Ka zonge-to to ro wukute. Shir conog m-gu ka ye ba **Yahuda**-ne á. Wu conog unze **Kiristi** she'et un no ne. Wu conog no ships ka dish-o unze noa kum seps-mo un wu, mo wu swore o-nu à. Te m-rure un kowan kwum-o ro wukusse mosse seps-m **Kiristi** ne à.

²⁸ Te ko'ote un kowan wu dore **Kiristi**. Komo te un yoose un kowan un myet-o us-weer ne. Yo a cone be-de un yoos-ur te à yo ro, bo myet-mo un yan-dor ye un **Kiristi** he m-es shiishe da-o ye he m-es un co-o Shir à.

²⁹ O rwo'e mette m-senge mar-m-mar. Komo um nomog bo un nom-m re um nomot ka senge-mo be-de un rwo un 'wons-mo **Kiristi** ya'u me à.

Bor-us yoor

¹ Um conog no nep gon mar-mo m-senge mo um rotte remen um guut no à, hun-ne ye o-Korosiya un ye un bo-o o-Rawudikiya ne, komo un ye ken yan-dor ye ne ye wete me m-hyan á.

² Me m-nom un yo ka remen um dooté kukt-o no jaab-o ut-men, komo remen was-m or no ne dootú no gam-o ur-hi. Un kaane no he kum un caari-o o-zak o-nip ne o hun-ne rotte ye nape Ma-to Shir à, remen no nept tom-o Shir wuke à, wata, **Kiristi** un hi un de un wu.

³ **Kiristi**, wu wu cot he no m-gu no waragte ya-us-weer no nept ka tom-o ur-bon to, to Shir rwunte m-moka cas to ro untun kashi o-kwum à.

⁴ Me no m-rure un yo ka taase wu ken wu raks no un rerem-mo o-nu.

⁵ Ko de nomte me un hi un de me kane mosse un no ne á, amba hur un de ro mosse un no ne. Me o-zak deen bo um hoge no eks cak à, komo un gam-o ur-hi ne. Komo no shereg be-ur **Kiristi**.

Dor Wan-Koyan hantute hoog-m pu-mo

⁶ No gokste ka tom-o unze **Kiristi** Yeso wu ro Wan-Koyan no. M-moka sengu no nom un yo wu cone no nom à, ko o ke da-o cinda no gemte ur-hi be-de un wu à.

⁷ Sher no geer-us no n-me un **Kiristi**, komo no senge m-do be-de un nap-se un wu. Komo sengu no m-sher ur-beeb ne be-de un yo hun-ne yoosu no à mosse un **Kiristi** ne à. Komo no senge bongon-de Shir.

⁸ Nom no ceen! Taase wu ken wu raks no, no dore bu-yo un wu á. Yo ye ro m-yoos à, a nom sa

o zee o-nip, amba bo-to komo rii-yo o-hwaa. Ka yoos-de un tor temb un yo hun-ne cowonte à. Ye ro m-yoose un hun-ne, unze ye m-dore un jor-se ma-hun komo beeb-de kukt-ut yo-to, un suge-de un yoose un hun-ne mosse un **Kiristi** ne.

⁹ Ko-de nomte **Kiristi** barmute wu warag untun hun-ne à, wu Shir wu jip.

¹⁰ Komo a mossute no un **Kiristi**, remen kaane no ro un koyan ne, yo no cone à yo o-Kukt. Wu wu ro un gwomo-to un koyan yo ro ut-gwomo à.

¹¹ Remen no gamag ur-hi be-ur **Kiristi**, ya no ro untun ye a nome ur-ko à. Me un zee kaane remen **Kiristi** doste **ba'as**-ut no. Ba ko-de o-wur de á, amba ko-de **Kiristi** ro m-nom à.

¹² Da-o a yo'osu no m-ho à, kutute na unze a jok she-et-de un **ba'as**-ut no bo a joke **Kiristi** à. A 'yonstu no bo a 'yonse **Kiristi** un hoog-m pu-mo à. Yo ka un nome remen no shereg unze Shir ye 'yonse **Kiristi** un hoog, wu ro komo un gwomo-to un nom un kaane ne.*

¹³ No ye ro **Yahuda**-ne á, a ro wongsutu no un Shir ne remen no jekt **karamsa**-o Shir. No jekt **karamsa**-o Shir, komo remen Shir possutu no be-de un beeb-de ut-**ba'as** á. Myet un kaane ne Shir 'yonstu no un hoog-m pu-mo ne un **Kiristi**, Shir soksutu na **ba'as**-ut na kap.†

¹⁴ Shir un nom yo ka da-o wu sokse ka takurda-o a gente **ba'as**-ut na kap à. Shir doste ka takurda-o a gente **ba'as**-ut na à da-o a kame **Kiristi** n-ton o-kan har wu mer à.‡

* **Bor-üş yoor:12 2:12** Hyen komo: Roma 6:4. † **Bor-üş yoor:13 2:13** Hyen komo: Apis 2:1-5. ‡ **Bor-üş yoor:14 2:14** Hyen komo: Apis 2:15.

15 Ba **ba'as**-ut na Shir sokse cot á amba komo wu jeste gwomo-to un ko-caari-wu un gwomo-to ut-kukt yo-to. Wu kutute kowan cas cas unze wu reeg ye ur-gun un bu-yo **Kiristi** merte n-ton o-**kan** à.

Dore ut-karamsa o bo'os á

16 No rege net ut-to á, urege wu piishitu no ut-ma to un:

Rii-yo no m-re,

Rii-yo no m-swo,

Ho-to no nom ut-biki á,

Ko ne nom o-zak un reng-o pu-yo, un

Ho-de ur-Wuwe ne á. §

17 No rege ye ut-to á, remen ká **karamsa**-to kap horomte-o. Remen **karamsa**-to to horomte-o un rii-yo ur-bon yo o-nip yo rwoone à. Komo **Kiristi** un hi un de un wu ro ka nip-o.

18 Remen kaane no yage yan-gwegwer-mo ur-hi mo ut-bo, un yan-kwukte un **yan-tom-ye Shir** ne gaktu no nom bo ye ro m-nom á. No dore yoos-de un ye no he de kumu un yar-mo Shir essu no á. Gon ka hun-ne ye ro m-zee ye jiište kowan un nap un Shir remen ye hyanag ut-hyangan. Weer-se un wu kap se un hur-de un wu se, komo se ro wu m-rwo us-ses. Amba o-nip wu rott cow-yo un nom us-ses á.

19 Wu yagusute dor-o un yoos-de o-nip mosse un **Kiristi** ne, wu ro hi-de o-wur à. Bo hi-ur ro m-kute o-wur o-cow à, kaane **Kiristi** ro m-kute un hun-ne ye un wu o-cow, remen ye gemet ur-hi

§ **Bor-uş yoor:16 2:16** Hyen komo: Roma 14:1-6.

be-ur gaan bo_rwo-us ro_m-bop o-wur à. Komo
o_bo'ose bo_Shir cone_à.*

Hoog-m pu-mo_n-me_ün Wan-Koyan

²⁰ Bo_rem-se ma-hun no_mer-se n-me_ün **Kiristi**
à, m-moka beeb-de_ün hono o-dak, a garamse_no
á. ¿Remen yan o_notte_ün nome_ün ka **karamsa-**
to o-dorotte_sa o zee hono o-dak o_ro_no_m-
garamse?

²¹ Ka ye_ro_no_m-yoose_ün ka **karamsa-to** à, ro_
no_m-zee, “Wo_jar o-jar o ci gon ka rii-yo á! Wo_jar
o-jar o rek gon ka rii-yo m-re_yo á! Wo_jar o-jar o
bup gon ka rii-yo á!”

²² Gon ka **karamsa-to** ro_untun rem-se ro_m-
gos á. A komse_ün to_ne_a argu_to_m-jore. Nom
mo_ün net-mo, mo_ün rwuun_ün yoos-de_ün net.
No_nome_gon ka rem-se o-dorotte_á.

²³ Ün yish-ye_ün hun-ne, gon ka **karamsa-to** ro_
ün sha-mo_us-nap ne, to_ro_m-hante_m-senge_deen
ün gwugwer-mo_ur-hi ne_a kutute_hun-ne_ünze
ye_torog be-de Shir. Har ye_ro_ün reese_ün wur-to_
ün ye_ur-koob. Ye_ro_m-zee ko_Shir a hoge_o-zak.
Amba o-nip ka **karamsa-to** rott de ken beeb-de to
hette_gu_ün hun-ne_ye_garamsute_wur-to_ün ye_á.

Bor-us tet

She'et-de_ün ba m-kukop

¹ Remen Shir ya'ag no_hoog-m pu-mo_sa o zee a
ün 'yons no_ün **Kiristi** ne_à, remen kaane_sengu
no_hoob_ün ka rii-yo ro_n-Ton shir à. Tu no_yish

* **Bor-us yoor:19 2:19** Hyen komo: Apis 4:16.

be-de **Kiristi** ro tara à be-de jiishe m-sekemse à un kom-o ur-re de Shir.*

² Remen kaane, sengu no barag-se un rem-se ro n-Ton shir à. No nom barag-se un ka rem-us yo-se se un kane un o-dak á.

³ No nom barag-se un ka rem-se un hono o-dak se á, remen no mereste un se, hoog-m no m-moka mo ro wukusse be-ur **Kiristi** be-de Shir.

⁴ Da-o **Kiristi**, wu ya'u no hoog à, wu muune un ka da-o, noa es un wu ne no kum seps-mo un wu.

⁵ Remen kaane yagu no nom un rem-se ba ur-bon, se mosse un she'et-de ma-hun ne à. No nom rem-se o-ás á, ko ne she'et-de un yish o-yoor á. Taase no nom suub-o un morogse us-rem un gop-de un rem-us yo-se ne. No nome kaane, no waragte o ka kwukte un ka rem-se.

⁶ Remen hun-ne ye ro m-nom un ka rem-us yo-se se à, Shir a 'ye ye ur-koob deen remen koob-de o-dorotte.

⁷ Gon ka rem-se no ro m-nom n-ga da-o no ro ur-she'et un bu-yo ma-hun à.

⁸ Amba m-moka taase no nom gon ka rem-se komo á. Taase no nom us-ryaab á. Yagu no naas un hun-ne ut-men un gon rii-yo no m-nom ko m-zee à. Taase no rwuunte gom-ut yo-to.

⁹ Tomso ne, no yage nome un or no ne ut-bo cinda no yagusute 'wutum-to un rii-to no ro m-nom à. Nom no kaane remen no kus bo no ro n-ga cin ba no un gokste **Kiristi** á.†

* **Bor-us tet:1 3:1** Hyen komo: Bong 110:1. † **Bor-us tet:9 3:9** Hyen komo: Apis 4:22.

¹⁰ Shir muutu no hun-ne pu-ye komo wu ro no m-jamas remen no waragté untun wu, remen no nept wu o-nip.‡

¹¹ Remen Shir muutu no hun-ne pu-ye m-moka koos-m mo kus á. Un ko-**Yahuda**, un wu ro ko-**Yahuda** á, myet gaan-to. Ko a koog net, ko a ko wu á, myet gaan-to. Koos-m mo kus á, ko ko-hamat ko ko-yan-ba-uş-weer ne, ko ne ko-guw, ko ne wu ro ko-guw á. **Kiristi** wu jiishe koyan, wu wu ro tomso ne n-me un hun-ne ye un wu myet.

¹² Shir daagu no remen no waragté kashi hun-ne ye un wu remen wu ro no m-was. Remen kaane sengu no hoge 'won-ur or no ne, no un 'ya m-yar, no nom gwugwer-mo ur-hi, no zee se ye ken ye nomog rii-yo no cone á. Hongsu no bo depe à no dungune.

¹³ Mo no ur-hur un **ba'as**-ut or no ne. Urege wu ken wu n-me no nomote wu ken wu **ur-ba'as**, no sokse wu. Hyange bo Wan-Koyan soksu no **ba'as**-ut no à, kaane tomso no he sokse un or no ne. §*

¹⁴ Yo arge yo ka ma à, was no or no ne. Remen no wasse or no ne, noa she'et no gem ur-hi be-ur gaan.

¹⁵ Yage she'et-de un ba ut-ween de **Kiristi** yoosu no à, de doruttu no bo no cone à. Nom no yo ka remen Shir daagu no, no she'ete no nom m-senge be-ur gaan ba ut-ween untun wur-o gaan. No senge bongon-de Shir un ko o ke da-o.

¹⁶ Yage ma-ut **Kiristi** to she'ete n-me un hur-ut no ko o ke da-o, to reet hi-de un yo no m-nom à un

‡ **Bor-uş tet:10 3:10** Hyen komo: Apis 4:24; Taka 1:26. § **Bor-uş tet:13 3:12-13** Hyen komo: Apis 4:2. * **Bor-uş tet:13 3:13** Hyen komo: Apis 4:32.

yo no uş-barag ne à. Nom no yo ka be-de un yoose un or no ne uş-weer ne, no un or no ne myet ut-ma weer-uş-weer. Tomso ne, no un hu un Sep-to ur-Bongon to Shir, komo no hu'e ut-sep, ut-dum ne to mosse **Kiristi** remen no kututé Shir unze hur-ut no ya'ase wu ur-bongon.

¹⁷ Myet bo un rii-yo no m-zee un yo no m-nom ne à, nom no yo n-me un jin-ur Wan-Koyan Yeso. No senge bongon-de Shir o-Tato un bu-yo un Wan-Koyan Yeso.[†]

Kashi-ur she'et-de un yan-dor Yeso

¹⁸ No ne'a-ne ye ut-ge, nome no campo no ne o-dorotte, remen yo yo depe yan-dor-ye un Wan-Koyan ye nom.[‡]

¹⁹ No campo-ne, no was un ne'a no ne. Was no ye no kutu ye ut-gagar á.[§]

²⁰ No yakar, nome no inu no un tat-ne no ne o-dorotte un ko yo ke rii-yo no m-nom à. Remen kaane Wan-Koyan cone no nom.*

²¹ No tat-ne, no su'e yakar no á, un ko yo ke rii rek-yo yo ye nome yo ba ur-bon á, taasü ye ruut ur-hur be-ur no. No nome ye kaane yea nom uş-ryaab ye yage nom un yo depe à.[†]

²² No guw-ne, no nom o-dorotte o un yan-hur-ut no ye un hono o-dak, un ko yo ke rii-yo yo no m-nom à. Taase no nom senge-mo un hyan-o un yish, untun yan-hoob-o ur-jin be-de un hun-ne,

[†] **Bor-uş tet:17 3:16-17** Hyen komo: Apis 5:19-20. [‡] **Bor-uş tet:18 3:18** Hyen komo: Apis 5:22; 1Bit 3:1. [§] **Bor-uş tet:19 3:19** Hyen komo: Apis 5:25; 1Bit 3:7. * **Bor-uş tet:20 3:20** Hyen komo: Apis 6:1. [†] **Bor-uş tet:21 3:21** Hyen komo: Apis 6:4.

un suge-de un kaane nom no senge-m no hur-ur
gaan, remen no m-'ya un Wan-Koyan m-sek.

²³ Myet-mo un rii-yo no m-nom à, nom no yo
zak-o-zak un hur-ut no, untun ye ro m-nome un
Wan-Koyan m-senge à. Ba ye ro m-senge remen
net á.

²⁴ Nom no kaane, no nep ha unze Wan-Koyan
Yeşo a top no. Remen kaane, nom no senge-m no
ur-bon ne. Wu 'ye no rem-se ur-bon se wu esse
hun-ne ye un wu à. Baks no unze **Kiristi** wu ro
Wan-Koyan no wu no m-nome m-guw à.

²⁵ Urege wu ken wu be-ur no ro un nom un rii-
yo ba ur-bon, Shir a 'ye wu ur-koob bo wu cone
à. Remen koos-mo ur-hi ro kon be-de Shir á.‡§

Bor-uş nass

¹ No ya-ut-hur, bop no guw no ne ur-bon ne.
No nomo ye rii-yo depe à. Baks no, no ma no un
nome un Wa-o-Hur m-guw n-Ton shir.*

Se ken karamsa se

² Sengu no uş-kon be-de Shir koyanda. Da-o no
uş-kon à, sengu no ur-'er ur-bongon ne.

³ No baks te tomso ne da-o no ro uş-kon. Kon no
unze Shir tekse te cow-yo un ko'ot un ma-to un wu
à, remen te ko'otuté hun-ne ka ma-to mosse un
Kiristi ne, ka ma-to to Shir wuke n-ga à. Remen
un ko'otte ka ma-to o rwo'e mette ke'o.

‡ **Bor-uş tet:25 3:22-25** Hyen komo: Apis 6:5-8. § **Bor-uş tet:25**
3:25 Hyen komo: Kara 10:17; Apis 6:9. * **Bor-uş nass:1 4:1** Hyen
komo: Apis 6:9.

⁴ Kon no rem re, bo um he m-senge m-ko'ot un ka **Ma-to-m-Rerem** to cas cas à, bo depe um nom à.

⁵ Da-o no ro mosse un hun-ne ne ye shere be-ur Yeso á, rwo no us-weer be-de un rii-yo no he m-nom à. No nom yo bo no he hoks m-nom à un da-o no kume à.†

⁶ Nomo no ye ut-ma gwerger, remen ye hoguté rerem-mo un regen no ut-to un yo no m-zee à. Da-o no m-rwor à, nom no ceen remen no nept bo depe no shes wu à weer-us-weer.

Gas-de ur-kom

⁷ Tikokoş a ruru no yo koru me kane à. Wu or na wu ko-yan-dor-wu me m-was un wu ne deen à. Wu ko-yan-ess ut-ma be-ur Wan-Koyan komo wu ro m-nome un Wan-Koyan m-guw mosse un me ne.‡

⁸ Yo rwo'e, um tombute wu be-ur no, wu hyen no à, remen no nept o bo te ro à. Tomso ne, wu dootú no jaab-o ut-men un sher-m no.§

⁹ Wu robe mosse un Onesimus ne. Onesimus or na wu ko-yan-dor komo, ko-yan-ess ut-ma ko-yan-bo-o no wu, te m-was un wu ne. Yoor-mo un ye a ruru no koyan yo koru te kane à.*

¹⁰ Aristarkus, wu ro mosse un me ne kane ke'o à, wu zeeg um gas no. Kaane komo Markus wu ro heno† Barnabas à wu ma wu zeeg um gas no. (Um nomsutu no ma-ut Markus remen kaane no

† **Bor-uş nass:5 4:5** Hyen komo: Apis 5:16. ‡ **Bor-uş nass:7 4:7**

Hyen komo: Seng 20:4; 2Tim 4:12. § **Bor-uş nass:8 4:7-8** Hyen

komo: Apis 6:21-22. * **Bor-uş nass:9 4:9** Hyen komo: Pmon

10-12. † **Bor-uş nass:10 4:10** Tato Markus ne un tato Barnabas ne, tato-o gaan mate ye.

nepste yo m-nom, da-o wu woḃe be-ur no, goks no wu kom-ut yoor.)‡

11 Yešo, wu a m-aag Justus à, ro no m-gas eb un wu ne. Ka hun-ne tet-ye cot ye ro **Yahuda**-ne ye shere kane à. Ye ro m-senge un me ne ye rurut **Ma-to m-Rerem** mosse un gwomo-to Shir ne. Ye dootu me jaab-o ut-men deen.

12 Komo Epaparas, ko-yan-bo-o no ro no m-gas. Wu ko-yan-guw-m **Kiristi** Yešo wu. Wu ro uş-kon be-de Shir deen ko o ke da-o rem no, untun net-wu wu ro ut-mur à. Wu ro uş-kon bo no he m-ha co no es cak un beeb-de o-Kukt à, komo no nom yo Shir cone no nom à.§

13 Um hyennesse hon un koob-de wu swo rem no à, komo un yan-dor ne n-me un bo-to o-Rawudikiya, o-Hiriporis ne.

14 Ruka, ko-ya-uş-baat, nay te, wu te m-was à, wu ro no m-gas, kaane tomso ne Dimas.*

15 No gassu me myet-mo un or na ne yan-dor ye ro un bo-o o-Rawudikiya à. Gassu me no ka ne'a-wu Nimpa mosse un hun-ne yan-dor ne ye ro m-morge un hur-o un wu à.

16 A komsu no karante un ka takurda-o um genbu no à, no heete hun-ne yan-dor ye ro o-Rawudikiya, remen ye karantuté o. No tomso ne, no karante takurda-o um gene yan-dor ye o-Rawudikiya à.

‡ **Bor-uş nass:10 4:10** Hyen komo: Seng 19:29; 27:2; Pmon 24; Seng 12:12,25; 13:13; 15:37-39. § **Bor-uş nass:12 4:12** Hyen

komo: Koro 1:7; Pmon 23. * **Bor-uş nass:14 4:14** Hyen komo: 2Tim 4:11; Pmon 24; 2Tim 4:10; Pmon 24.

¹⁷ Ruru no Arkibus, “Kom ka senge mo Wan-
Koyan bobsu wo à.”†

¹⁸ Me, Burus, me genbe ka gen-mo ur-buste mo
un hi un de um gastu no, remen no nept unze
me genbe ka takurda-o. Baks no unze um ro ke'o,
taase to-to ke no unze no kon Shir rem re. Yar-m
Kiristi Yeso ro un no ne!

† **Bor-uş nass:17 4:17** Hyen komo: Pmon 2.

ut-Hun

The New Testament in the ut-Hun language of Nigeria

copyright © 2017 Wycliffe Bible Translators, Inc.

Language: ut-Hun

Contributor: WBT Central Zone

All rights reserved.

2025-07-09

PDF generated using Haiola and XeLaTeX on 26 Jul 2025 from source files
dated 9 Jul 2025

c0c13181-081b-50cb-89bb-9a36796100b2